



Gwasanaeth Tân ac Achub
Fire and Rescue Service

Strategaeth yr Ystâd 2026–2036

Diogel · Cynhwysol · Gweithredol Effeithiol · Ariannol Gynaliadwy · Parod at y Dyfodol

Crynodeb

Mae'r ddogfen hon yn crynhoi themâu, blaenoriaethau ac ymrwymïadau allweddol Strategaeth yr Ystâd. Yn cefnogi'r ddogfen mae Strategaeth yr Ystâd dechnegol fanwl sy'n cynnwys y sylfaen dystiolaeth lawn, asesiad o gyflwr, y fethodoleg ar gyfer blaenoriaethu buddsoddiad, rhaglen gyflawni a threfniadau llywodraethu.

Contents

1. Pam mae ein hystâd yn bwysig.	4
2. Gogledd Cymru a'r cymunedau yr ydym yn eu gwasanaethu	5
3. Beth mae ein hystâd yn ei gynnwys.....	6
4. Cyflwr presennol ein hystâd	7
5. Adeiladau blaenoriaeth a ffocws cynnar.....	8
6. Beth sydd angen newid	9
7. Ein gweledigaeth, cenhadaeth ac egwyddorion.....	11
8. Lleoliad gorsafoedd a rhesymoli'r ystâd.....	12
9. Hyfforddiant a Hwb Awen	13
10. Cynaliadwyedd, lleihau carbon a gwrthsefyll effeithiau newid yn yr hinsawdd.....	14
11. Y seilwaith digidol a deallusrwydd asedau.....	15
12. Blaenoriaethu buddsoddiad a chynllun cyflawni	16
13. Llywodraethu, atebolrwydd a mesur llwyddiant	18
14. Casgliad	20

Neges gan ein Prif Swyddog Tân



Mae ystâd Gwasanaeth Tân ac Achub Gogledd Cymru yn ased gweithredol hollbwysig. Mae'n cefnogi ymateb brys, atal, diogelu, gwytnwch ac ymgysylltu â'r gymuned ledled Gogledd Cymru. Ein hadeiladau yw lle mae ein pobl yn gweithio, yn hyfforddi, yn paratoi, yn ymateb ac yn adfer. Maent hefyd yn lleoedd lle rydym yn croesawu partneriaid, yn ymgysylltu â chymunedau ac yn darparu gwasanaethau sy'n helpu i gadw pobl yn ddiogel.

Mae'r strategaeth hon yn nodi sut y bydd ein hystâd yn datblygu rhwng 2026 a 2036. Mae'n cydnabod bod llawer o'n hadeiladau wedi gwasanaethu'r Gwasanaeth a chymunedau lleol yn dda dros nifer o ddegawdau. Mae hefyd yn cydnabod bod y ffordd yr ydym yn gweithio wedi newid. Erbyn hyn mae angen i'n hadeiladau gefnogi ymateb brys modern a darparu lleoedd diogel, iach a chroesawgar i bobl weithio ynddynt ac i'n cymunedau. Mae angen iddynt hefyd wneud defnydd o systemau digidol, helpu i leihau allyriadau carbon a gwella'r ffordd yr ydym yn rheoli ein hasedau.

Datblygwyd y strategaeth dechnegol lawn drwy gynnal adolygiadau manwl o'n hadeiladau, systemau digidol ac allyriadau carbon, yn ogystal â chael adborth gan staff a phartneriaid. Mae'r ddogfen hon yn crynhoi'r gwaith hwnnw. Mae'n egluro ein cynlluniau, pam mae angen buddsoddiad, a sut y byddwn yn sicrhau bod penderfyniadau yn seiliedig ar dystiolaeth, yn dryloyw ac yn deg.

Mae'r heriau'n sylweddol. Mae angen i ni fynd i'r afael ag ôl-groniad o waith cynnal a chadw, gwella rheolaeth halogiad, moderneiddio cyfleusterau lles a hyfforddi, cefnogi gweithlu mwy amrywiol a lleihau allyriadau carbon. Mae peth o'r gwaith pwysig hwn eisoes ar y gweill. Mae hyn yn cynnwys cynllunio ar gyfer gorsafoedd blaenoriaeth a Chanolfan Hyfforddi a Datblygu Hwb Awen, ynghyd â gwella data asedau ac adolygu'r ffordd y caiff cyfleusterau eu rheoli yn y dyfodol. Mae'r strategaeth hon yn ymwneud â mwy nag adeiladau yn unig. Mae'n ymwneud â sut mae ein hystâd yn ein helpu i greu Gwasanaeth Tân ac Achub diogel, cynhwysol, cynaliadwy a gweithredol effeithiol ar gyfer cenedlaethau'r dyfodol.

Dawn Docx,
Chief Fire Officer





1. Pam mae ein hystâd yn bwysig

Ein hystâd yw'r sylfaen ffisegol sy'n cynnal Gwasanaeth Tân ac Achub Gogledd Cymru. Mae'n cynnwys gorsafoedd tân amser llawn, gorsafoedd â chriw dydd, gorsafoedd niwclews, gorsafoedd ar alwad, pencadlys, cyfleusterau hyfforddi, gweithdai, mannau storio ac adeiladau cymorth gweithredol eraill. Mae gan bob cyfleuster rôl mewn helpu ein pobl i baratoi ar gyfer digwyddiadau, cynnal a chadw offer, darparu hyfforddiant, cefnogi gwaith atal ac amddiffyn a darparu ymateb brys ar draws y rhanbarth.

Ni all buddsoddiad yn yr ystâd fod yn seiliedig ar oedran adeilad yn unig. Mae'r strategaeth lawn yn ei gwneud yn glir bod yn rhaid i benderfyniadau fod yn gysylltiedig â galw gweithredol, risg cymunedol, lles staff, dyletswyddau cyfreithiol, cyfrifoldebau amgylcheddol a gwerth am arian hirdymor. Efallai y bydd adeilad angen sylw oherwydd ei gyflwr, ond mae'n bosibl hefyd y bydd angen buddsoddi ynddo oherwydd nad yw ei osodiad bellach yn cynnal prosesau diffodd tân modern; oherwydd nad yw ardaloedd lles yn addas; oherwydd bod rheoli halogiad yn anodd, neu oherwydd bod y safle yn hanfodol i wydnwch y gwasanaeth.

Mae'r cysylltiad hwn rhwng tystiolaeth, blaenoriaethau a buddsoddiad yn cael ei ddisgrifio yn y strategaeth dechnegol fel yr "edau aur". Mae'n golygu y dylai fod yn bosibl olrhain pob penderfyniad mawr a wneir am yr ystâd yn ôl at reswm clir dros y penderfyniad hwnnw. Er enghraifft, gallai prosiect leihau risg weithredol, gwella cydymffurfiaeth statudol, cefnogi cyfleusterau cynhwysol, lleihau allyriadau carbon neu fynd i'r afael â dirywiad yn adeiledd adeilad neu mewn systemau mecanyddol sy'n gofyn am sylw ar frys

Mae i'r ystâd werth cyhoeddus hefyd. Mae gorsafoedd tân yn asedau cymunedol gweladwy. Maent yn cefnogi hunaniaeth leol, parodrwydd gweithredol a hyder y cyhoedd. Mae'r strategaeth felly'n canolbwyntio ar wneud yr ystâd bresennol y gorau y gall fod, gan gadw cyfleoedd ar gyfer y dyfodol dan adolygiad os bydd amgylchiadau'n newid.



2. Gogledd Cymru a'r cymunedau yr ydym yn eu gwasanaethu

Mae Gwasanaeth Tân ac Achub Gogledd Cymru yn gweithredu ar draws Ynys Môn, Gwynedd, Conwy, Sir Ddinbych, Sir y Fflint a Wrecsam. Mae'r ardal yn cynnwys trefi mawr, cymunedau gwledig ac amaethyddol, aneddiadau arfordirol, ardaloedd diwydiannol a masnachol, cysylltiadau cludiant ac amgylcheddau ucheldir Eryri. Mae'r ddaearyddiaeth hon yn siapia pob penderfyniad a wneir am yr ystâd.

Mewn ardaloedd gwledig, mae pellteroedd teithio a'r gallu i ddarparu'r gwasanaeth yn lleol yn bwysig. Mewn ardaloedd arfordirol, gall gorsafoedd wynebu newidiadau tymhorol yn y boblogaeth, pwysau o ganlyniad i dwristiaeth, perygl o lifogydd ac effeithiau tywydd garw. Mewn ardaloedd trefol a diwydiannol, mae'n rhaid i'n gorsafoedd gefnogi ymateb i wahanol batrymau o ddigwyddiadau, gweithgarwch atal a gweithio mewn partneriaeth. Mae'n rhaid i'r ystâd felly fod yn ddigon hyblyg i gefnogi anghenion lleol amrywiol ond ar yr un pryd barhau i fodloni safonau digyfnewid ar draws y gwasanaeth.

Mae'r strategaeth lawn yn nodi nifer o elfennau sy'n sbarduno'r galw ar y gwasanaeth ac yn dylanwadu ar gynllunio'r ystâd. Mae'r rhain yn cynnwys tueddiadau yn y boblogaeth, tueddiadau o ran digwyddiadau, proffil risg y Cynllun Rheoli Risg Cymunedol, newid yn yr hinsawdd, twristiaeth a newidiadau tymhorol yn y boblogaeth, y defnydd o beiriannau, gweithgarwch atal ac amddiffyn a gofynion gweithredol y dyfodol.

Mae'r sbardunau hyn yn dangos pam y mae'n rhaid cynllunio ein hystâd mewn ffordd strategol. Mae Gwasanaethau Tân ac Achub bellach yn ymateb i ystod eang o ddigwyddiadau y tu hwnt i danau traddodiadol, gan gynnwys gwrthdrawiadau traffig y ffyrdd, llifogydd, tanau gwyllt a gweithgarwch achub arbenigol. Mae'n rhaid i'n hadeiladau ddarparu'r lle, y systemau a'r seilwaith cywir i gefnogi'r rôl ehangach honno.



PENCADLYS

GWASANAETH TÂN AC ACHUB

FIRE & RESCUE SERVICE

HEADQUARTERS

3. Beth mae ein hystâd yn ei gynnwys

Mae ystâd GTAGC yn eang ac amrywiol. Roedd yr asesiad o gyflwr stoc yn cwmpasu 49 o safleoedd. Mae'r rhwydwaith gorsafoedd tân gweithredol yn cynnwys 44 o orsafoedd tân, sy'n cynnwys 3 gorsaf amser llawn, gorsaf â chriw 5 diwrnod, 2 orsaf niwclews a thua 34 o orsafoedd ar alwad neu gymunedol. Mae'r ystâd hefyd yn cynnwys y pencadlys yn Llanelwy, y pencadlys wrth gefn dynodedig a'r ystafell reoli eilaidd yng Ngorsaf Dân Gymunedol y Rhyl, prif safleoedd hyfforddi, gweithdy'r fflyd, cyfleusterau a rennir, adeiladau storio ac adeiladau ategol.

Mae pob rhan o'r ystâd yn cynnal swyddogaeth wahanol. Mae ar orsafoedd llawn amser angen cyfleusterau sy'n cynnal defnydd gweithredol parhaus, lles, ardaloedd gorffwys, hyfforddiant, ffitrwydd, storio offer, rheoli halogiad a gweinyddu. Mae ar orsafoedd gwasanaeth ar-alwad a chymunedol angen cyfleusterau diogel, ymarferol a chymesur sy'n cefnogi ymateb lleol, hyfforddiant, lles, storio ac ymgysylltu â'r gymuned.

Mae'r pencadlys yn Llanelwy yn cyflawni rôl sefydliadol ganolog, gan gynnwys swyddogaethau gorchymyn a rheoli. Mae i Orsaf Dân Gymunedol y Rhyl bwysigrwydd strategol penodol oherwydd ei bod, fel yr orsaf reoli wrth gefn ddynodedig, yn cynnal gwytnwch o ran gorchymyn a chyfathrebu. Mae hyn yn golygu bod angen ystyried ei chyflwr, ei seilwaith digidol a'i gwytnwch fel blaenoriaeth sefydlog, nid yn unig trwy ei sgôr cyflwr ffisegol.

Mae gweithdy'r fflyd hefyd yn bwysig oherwydd bod cynllunio'r fflyd a'r ystâd yn fwyfwy cysylltiedig. Wrth i'r Gwasanaeth symud tuag at ddatgarboneiddio'r fflyd, bydd yn ofynnol bod â chyfleusterau gweithdy a chapasiti trydanol sy'n cefnogi technoleg cerbydau'r dyfodol a gofynion cynnal a chadw newidiol.

4. Cyflwr presennol ein hystâd

Rhwng 2025 a 2026, cynhaliwyd yr asesiad mwyaf cynhwysfawr o gyflwr stoc yr ystâd yn hanes y gwasanaeth. Aseswyd tri phrif faes craidd ym mhob safle, sef cyflwr trydanol, adeiledd yr adeiladau a gwasanaethau mecanyddol Rhoddodd hyn ddarlun cliriach o le mae angen gwneud gwaith brys a lle gellir gwneud buddsoddiad cyfalaf fesul cam.

Mae'r canfyddiadau'n dangos ystâd gymysg. Mae tua 38.7% o'r ystâd mewn cyflwr da a gellir ei rheoli trwy gynnal a chadw ataliol wedi'i gynllunio. Mae tua 28.5% yn gofyn am waith wedi'i gydlynw o fewn y tair i bum mlynedd nesaf. Mae gan tua 32.6% sgôr cyflwr sy'n nodi bod angen gwneud gwaith atgyweirio neu adnewyddu brys.

Amcangyfrifir bod yr atebolrwydd cynnal a chadw ôl-gronnus dangosol rhwng £3 miliwn a £4 miliwn ar brisiau 2026. Mae'r ôl-groniad hwn yn ymwneud â gwaith sydd eisoes yn hwyr neu sydd ei angen o fewn tua dwy flynedd i godi eiddo i fyny i safon weithredol dderbyniol. Mae'r gwaith hwn ar wahân i'r rhaglen ehangach o drawsnewid, datgarboneiddio a gwella tymor hir.

Ffeithiau allweddol am yr ystâd

49 o safleoedd wedi'u harolygu; 44 o orsafoedd tân gweithredol; gwaith brys yn angenrheidiol mewn 32.6% ; ôl-groniad dangosol o £3m–£4m.

Mae'r ôl-groniad wedi'i ganolbwyntio ar draws sawl maes: adeiledd fel toeau, ffenestri, amlen allanol, draenio a blaengyrtiau; seilwaith mecanyddol a thrydanol fel boeleri, gwresogi, awyru, ailweirio a dyfeisiadau trydanol; seilwaith gweithredol fel drysau bae, storio, arwyddion a diogelwch; cyfleusterau lles fel cawodydd, ystafelloedd newid, ceginau, mannau gorffwys a loceri; a chydymffurfiaeth statudol megis ardystiad trydanol, asbestos, larymau tân a rheolaethau Legionella.

Bydd y system rheoli asedau digidol newydd yn caniatáu meintioli'r ôl-groniad hwn yn ffurfiol a'i fonitro'n fwy manwl gywir. Mae hynny'n bwysig oherwydd y bydd gwell gwybodaeth yn cefnogi gwell penderfyniadau, adrodd cliriach a defnydd mwy effeithiol o arian cyhoeddus.



5. Adeiladau blaenoriaeth a ffocws cynnar

Mae'r asesiad cyflwr yn nodi nifer o safleoedd blaenoriaeth. Nid y safleoedd hyn yw'r unig adeiladau sy'n gofyn am fuddsoddiad, ond maent yn helpu i siapiau camau cynnar y rhaglen oherwydd bod eu cyflwr, eu rôl weithredol neu'r newid a fwriedir yn creu mwy o angen am ymyrraeth.

Gorsaf Dân Dolgellau yw'r safle blaenoriaeth uchaf. Mae seilwaith trydanol ac adeiledd yr orsaf yn hen ac mae'n newid i statws criwio niwclews, sy'n golygu bod angen gwaith adnewyddu mawr. Mae Porthmadog hefyd yn newid i statws criwio niwclews ac mae angen newidiadau mewnol sylweddol i gynnal cyfleusterau lles, gweithredol, gweinyddol, hyfforddi a chynhwysol modern.

Mae Gorsaf Dân Bangor yn brosiect moderneiddio blaenoriaeth arall. Mae'r strategaeth yn dynodi'r angen am welliannau ym meysydd lles, rheolaeth halogiad, cydraddoldeb, amrywiaeth a chynhwysiant. Bydd Bangor, Dolgellau a Phorthmadog felly yn brosiectau dysgu pwysig. Bydd y safonau, y cynlluniau a'r gwersi a ddysgir o'r cynlluniau hyn yn helpu i siapiau prosiectau a gwaith adnewyddu'r dyfodol ar draws yr ystâd.

Mae safleoedd blaenoriaeth eraill yn cynnwys Y Waun, Abersoch, Amlwch, Caernarfon, Caergybi, Llandudno a Threffynnon. Mae'r safleoedd hyn yn cyflwyno gwahanol gyfuniadau o adeiledd sy'n heneiddio, problemau mecanyddol a thrydanol, cyfyngiadau lles, amodau arfordirol, gofynion gweithredol ac anghenion cylch bywyd. Mae Abergele a Benllech hefyd wedi'u hamlygu oherwydd lefel uwch o bryder ynghylch eu hadeiledd sydd yn gofyn am fonitro agos ac ymyrryd fel mater o flaenoriaeth os bydd y risgiau'n cynyddu.

Nid yw'r strategaeth yn trin sgorio blaenoriaeth fel ymarfer unwaith yn unig. Wrth i wybodaeth fwy cywir am asedau ddod i law, ac wrth i gyflwr adeiladau a gofynion gweithredol newid, bydd blaenoriaethau'n cael eu hadolygu trwy'r strwythur llywodraethu ffurfiol.

Dysgu cynnar o'r prosiect

Bydd Bangor, Dolgellau a Phorthmadog yn helpu i siapiau safonau dylunio'r dyfodol ar draws yr ystâd.

Bydd y broses o gyflawni rhaglen gynnar yr ystâd hefyd yn cael ei chefnogi gan newidiadau i drefniadau rheoli cyfleusterau. Mae'r Cytundeb Lefel Gwasanaeth Rheoli Cyfleusterau cydweithredol gyda Heddlu Gogledd Cymru wedi bod ar waith ers dros 20 mlynedd ac wedi chwarae rhan bwysig wrth gynnal a datblygu ystâd y Gwasanaeth.

Wrth i'r Gwasanaeth geisio mynd i'r afael â nifer o heriau ystâd sy'n dod i'r amlwg, gan gynnwys gwaith atgyweirio a chynnal a chadw ôl-gronnus, rheolaeth halogiad, gofynion cydraddoldeb, amrywiaeth a chynhwysiant, a chyflawni ymrwymadau lleihau carbon, cynhaliwyd adolygiad o'r trefniadau ar gyfer y dyfodol.

Yn dilyn yr adolygiad hwn, mae'r Gwasanaeth a Heddlu Gogledd Cymru wedi cytuno ar y cyd y bydd y Cytundeb Lefel Gwasanaeth yn dod i ben ym mis Mawrth 2027. Mae'r cyfnod pontio yn darparu cyfle i adeiladu ar y sylfeini cadarn a sefydlwyd drwy'r bartneriaeth, gan ddatblygu ar yr un pryd fodel gweithredu sy'n cyd-fynd ag uchelgeisiau a blaenoriaethau'r Strategaeth Ystâd hon ar gyfer y dyfodol.

6. Beth sydd angen newid

Mae'r strategaeth yn nodi deng blaenoriaeth gysylltiedig ar gyfer yr ystâd. Gyda'i gilydd, mae'r blaenoriaethau hyn yn esbonio beth sydd angen newid ar draws ein hadeiladau a sut y bydd buddsoddiad yn y dyfodol yn cefnogi ystâd fwy diogel, cynhwysol, gweithredol effeithiol a chynaliadwy.

1

Ôl-groniad cynnal a chadw a chyflwr adeiladau: Byddwn yn mynd i'r afael â gwaith adeiladu brys a hwyr mewn ffordd wedi'i gynllunio, gan ganolbwyntio'n gyntaf ar y safleoedd a'r materion sy'n peri'r risg fwyaf o safbwynt weithredol, diogelwch neu ariannol. Bydd hyn yn helpu i symud yr ystâd i ffwrdd oddi wrth waith trwsio adweithiol tuag at gynnal a chadw hirdymor wedi'i gynllunio.

2

Cydymffurfiaeth statudol: Mae'n rhaid i bob adeilad fod yn ddiogel, cydymffurfio â'r gofynion cyfreithiol a chael ei reoli'n briodol. Byddwn yn cryfhau sut yr ydym yn monitro, yn rhoi tystiolaeth o, ac adrodd ar gydymffurfiaeth ar draws yr ystâd.

3

Ymarferoldeb gweithredol a safoni: Mae'n rhaid i'n gorsafoedd gefnogi ymateb brys modern, gyda chynllun, manau storio, baeau offer ac ardaloedd lles sy'n helpu criwiau i weithio'n ddiogel ac yn effeithlon. Bydd dyluniad gorsafoedd sy'n cael eu hailwampio'n seiliedig ar safonau clir a chyson, ond gan barhau i adlewyrchu anghenion lleol.

4

Rheolaeth Halogiad: Byddwn yn gwella sut y mae ein hadeiladau'n helpu i leihau amlygiad diffoddwyr tân i halogion. Mae hyn yn cynnwys creu gwell parthau glân a budr, symudiad mwy diogel trwy orsafoedd a chyfleusterau sy'n cynnal canllawiau halogiad cenedlaethol.

5

Lles y gweithlu: Dylai ein hystâd gefnogi iechyd, cysur a lles pawb sy'n gweithio ynddi. Mae hyn yn golygu gwella cyfleusterau fel cawodydd, manau newid, manau gorffwys, ceginau, manau tawel a darpariaeth ffitrwydd lle bo hynny'n briodol.

6

Cydraddoldeb, amrywiaeth a chynhwysiant: Mae'n rhaid i'n hadeiladau fod yn groesawgar, yn hygyrch ac yn urddasol i bob aelod o'n gweithlu ac ymwelwyr. Byddwn yn gwella cyfleusterau cynhwysol, gan gynnwys darpariaeth lleoedd newid a lles hygyrch, niwtral o ran rhywedd a phriodol.

7

Seilwaith hyfforddi : Mae hyfforddiant modern yn gofyn am gyfleusterau modern. Byddwn yn gwella'r ystâd hyfforddi trwy Hwb Awen - y Ganolfan Hyfforddi a Datblygu newydd arfaethedig, neu trwy fuddsoddi yn y safleoedd hyfforddi sydd gennym yn barod os nad yw'r cynllun hwnnw'n mynd yn ei flaen fel y bwriadwyd.

8

Ymgysylltiad a chydweithredu cymunedol: Mae gorsafoedd tân yn asedau cymunedol pwysig. Byddwn yn chwilio am gyfleoedd i'n hystâd gefnogi atal, diogelu, gweithio mewn partneriaeth ac ymgysylltu â'r gymuned leol yn well.

9

Digideiddio a deallusrwydd asedau: Mae'r gallu i wneud gwell penderfyniadau am yr ystâd yn gofyn am well gwybodaeth Byddwn yn cyflwyno trefniadau rheoli asedau digidol gwell fel bod penderfyniadau ynglŷn â chyflwr, cydymffurfiaeth, cynnal a chadw a buddsoddi yn seiliedig ar ddata dibynadwy.

10

Datgarboneiddio a chynaliadwyedd: Byddwn yn lleihau effaith amgylcheddol ein hadeiladau ac yn cefnogi ymrwymïadau sero net y Gwasanaeth. Mae hyn yn cynnwys gwella adeiledd adeiladu, lleihau'r defnydd o danwydd ffosil, cynyddu ynni adnewyddadwy a gwella monitro ynni.

7. Ein gweledigaeth, cenhadaeth ac egwyddorion

Ein Gweledigaeth

Darparu ystâd fodern, gynaliadwy a chynhwysol sy'n grymuso ein pobl, yn galluogi cyflawniad gweithredol rhagorol ac yn cefnogi cymunedau mwy diogel a chryfach ledled Gogledd Cymru.

Ein Cenhadaeth

Rheoli a datblygu ein hystâd yn strategol i sicrhau ei bod yn ddiogel, yn effeithlon, yn amgylcheddol gyfrifol ac yn cyd-fynd ag anghenion esblygol ein gwasanaeth, ein pobl a'n cymunedau.

Ein hegwyddorion

Egwyddor	Yr hyn y mae'n ei olygu i'r ystâd
Yn ddiogel ac yn cydymffurfio	Mae pob cyfleuster yn bodloni'r holl ofynion statudol. Mae rheolaeth halogiad wedi'i ymgorffori mewn dyluniad. Mae cydymffurfiaeth yn cael ei reoli'n rhagweithiol.
Gweithredol effeithiol	Mae dyluniad gorsafoedd yn cefnogi ymateb brys, llif gwaith effeithlon a symud diogel. Mae'r ystâd yn galluogi rhagoriaeth.
Addas ar gyfer Cyflenwi Gwasanaeth Modern	Mae cyfleusterau'n cefnogi dulliau diffodd tân modern, rheolaeth halogiad, hyfforddiant, ymgysylltu â'r gymuned a gofynion gweithredol esblygol.
Ariannol Gynaliadwy	Mae buddsoddiad wedi'i gynllunio, ei flaenoriaethu a'i arwain gan dystiolaeth. Mae cost oes gyfan yn ganolog i bob penderfyniad. Mae atebolrwydd o ran yr ôl-groniad o waith cynnal a chadw'n cael ei ddileu'n raddol.
Amgylcheddol Gyfrifol	Mae'r ystâd yn cyflawni yn erbyn rhwymedigaethau sero net Llywodraeth Cymru. Mae gwresogi gyda thanwydd ffosil yn cael ei ddileu'n raddol. Mae'r defnydd mwyaf posibl yn cael ei wneud o ynni adnewyddadwy.
Cynhwysol a Chefnogol o Les y Gweithlu	Mae pawb sy'n gweithio mewn, neu'n ymweld ag adeilad o eiddo GTAGC yn canfod cyfleusterau sy'n groesawgar, urddasol, hygyrch ac sy'n adlewyrchu eu hanghenion.
Digidol Alluog	Mae pob penderfyniad arwyddocaol am yr ystâd wedi'i ategu gan ddata dibynadwy am asedau, cyflwr a pherfformiad, ac mae pob cyfleuster wedi'i adeiladu i gefnogi'r cysylltedd sydd ei angen ar y Gwasanaeth modern.

8. Lleoliad gorsafoedd a rhesymoli'r ystâd

Mae'r strategaeth lawn yn cyd-fynd â'r Adolygiad o'r Ddarpariaeth Frys. Asesodd yr adolygiad hwnnw gyfluniad daearyddol yr ystâd gorsafoedd yn erbyn patrymau risg cymunedol cyfredol a rhagamcanedig. Y casgliad yw bod dosbarthiad presennol gorsafoedd tân Gogledd Cymru wedi'i ddilysu fel bod yn briodol i gefnogi ymateb brys effeithiol.

Mae hyn yn golygu nad yw Strategaeth yr Ystâd ceisio ail-greu'r map gorsafoedd. Yn hytrach, ei rôl yw sicrhau bod y gorsafoedd cywir, yn y lleoedd cywir, yn addas i'r diben. Mae'r ffocws felly ar wella, moderneiddio, gwytnwch ac addasrwydd yn hytrach na rhaglen o gau neu gydgrynhoi gorsafoedd.

Ystyriodd asesiad ar wahân gyfleoedd rhesymoli ystadau posibl. Roedd hyn yn cynnwys ystyried a ellid cyfuno, gwaredu neu ailwampio rhai cyfleusterau. Mae'r strategaeth yn dod i'r casgliad, er y gallai buddion ymylol fodoli mewn rhai achosion, nad yw'r ffactorau gweithredol, daearyddol, cymunedol, diwylliannol ac ariannol ar hyn o bryd yn cefnogi rhaglen weithredol o gydgrynhoi.

Mae'r enghraifft a ystyriwyd yn ymwneud â Bae Colwyn ac ardal Llandudno yn darlunio'r pwynt hwn. Mae daearyddiaeth, cyfyngiadau'r rhwydwaith ffyrdd, arwyddocâd cymunedol lleol a chost darparu cyfleuster cyfunol i gyd yn pwysu yn erbyn mynd ar drywydd gydgrynhoi fel blaenoriaeth strategol ar hyn o bryd.

Nid yw hyn yn golygu na fydd yr ystâd byth yn newid. Bydd cyfleoedd y dyfodol yn cael eu hystyried fesul achos trwy'r Pwyllgor Tir ac Eiddo os bydd amgylchiadau'n newid. Fodd bynnag, y cyfeiriad strategol presennol yw buddsoddi mewn gwneud pob gorsaf sydd gennym ar hyn o bryd y gorau y gall fod i'r gymuned y mae'n ei gwasanaethu.



9. Hyfforddiant a Hwb Awen

Mae hyfforddiant yn flaenoriaeth strategol arwyddocaol oherwydd bod ar y gwasanaeth angen cyfleusterau sy'n cefnogi dysgu gweithredol realistig, diogel a modern. Mae'r cyfleusterau hyfforddi presennol wedi'u gwasgaru ar draws sawl safle ac mae rhai asedau yn heneiddio. Mae'r strategaeth yn cydnabod bod yn rhaid i'r seilwaith hyfforddi wella fel bod y cyfleusterau angenrheidiol ar gael i ddifoddwyr tân a staff allu cynnal cymhwysedd gweithredol, cefnogi iechyd a lles a pharatoi ar gyfer risgiau'r presennol a'r dyfodol.

Yr opsiwn a ffefrir o hyd yw Hwb Awen, y Ganolfan Hyfforddi a Datblygu arfaethedig yn Llanelwy. Mae'r prosiect yn parhau i fod yn fuddsoddiad strategol bwysig i'r Gwasanaeth, gan gefnogi gallu gweithredol, iechyd a lles difoddwyr tân a gwydnwch sefydliadol tymor hwy. O'i gwireddu, byddai Hwb Awen yn cynnig cyfleusterau hyfforddi modern, pwrpasol ac yn cefnogi uchelgeisiau ehangach y Gwasanaeth i gyflwyno hyfforddiant mwy diogel, realistig a chynaliadwy.

Mae i Hwb Awen hefyd werth strategol ehangach oherwydd ei pherthynas bosibl â phencadlys Llanelwy. Mae'r strategaeth yn cydnabod y cyfle i greu canolfan weithredol, hyfforddi a sefydliadol gryfach a mwy integredig pe bai'r cyllid ar gael.

Mae'r strategaeth hefyd yn ystyried yr Achos Busnes Amlinellol ar gyfer Hwb Awen ochr yn ochr ag opsiynau amgen os na chaiff cyllid llawn ei sicrhau o fewn y blynyddoedd cynnar. Yn y sefyllfa honno, byddai angen buddsoddiad sylweddol yn yr ystâd hyfforddi bresennol o hyd, gan gynnwys gwaith brys ar dyrau hyfforddi, gwelliannau i gyfleusterau lles a thechnoleg hyfforddi, fel bod cyfleusterau'n parhau i fod yn ddiogel ac yn gwbl addas tra bydd opsiynau tymor hwy'n cael eu hadolygu.

Mae'r ymdriniaeth hon yn darparu sefyllfa gytbwys. Hwb Awen yw'r llwybr trawsnewidiol a ffefrir o hyd ar gyfer y seilwaith hyfforddi, ond mae'r Gwasanaeth yn rheoli'r risgiau ariannol a rhaglen yn ofalus wrth barhau i gryfhau'r achos dros fuddsoddi. Os na fydd modd bwrw ymlaen â'r llwybr a ffefrir fel y cynlluniwyd, bydd angen i'r Strategaeth Ystâd ehangach sicrhau o hyd bod yr ystâd hyfforddi bresennol yn parhau'n ddiogel, yn alluog ac yn cyd-fynd â gofynion gweithredol. Gallai hyn olygu bod angen i'r Gwasanaeth ystyried modelau darparu amgen, gan gynnwys datblygu fesul cam, trefniadau partneriaeth, cyfleusterau a rennir neu ddefnydd cynyddol o asedau hyfforddi rhanbarthol neu genedlaethol. Byddai opsiynau o'r fath yn cael eu hasesu yn erbyn gofynion gweithredol, gwerth am arian, gwytnwch a'u haddasrwydd strategol hirdymor.

hwb awen

10. Cynaliadwyedd, lleihau carbon a gwrthsefyll effeithiau newid yn yr hinsawdd

Mae datgarboneiddio yn flaenoriaeth gyfreithiol, amgylcheddol a gweithredol. Mae GTAGC wedi ymrwmo i gyflawni allyriadau carbon sero net ar draws y gwasanaeth cyfan erbyn 2030. Mae'r strategaeth yn cadarnhau na fydd unrhyw system wresogi hydrocarbon newydd yn cael ei gosod na'i hadnewyddu'n sylweddol yn unman yn yr ystâd y tu hwnt i ddiwedd blwyddyn ariannol 2024/25.

Ar hyn o bryd mae'r ystâd yn defnyddio oddeutu 2,639,751 kWh o nwy naturiol, 96,520 kWh o LPG a 1,374,357 kWh o drydan bob blwyddyn. Mae hyn yn cyfateb i allyriadau gwaelodlin Cwmpas 1 o 502.7 tCO₂e ac allyriadau Cwmpas 2 o 240.4 tCO₂e. Mae'r ffigurau hyn yn dangos maint yr her a'r angen am lwybr strwythuredig.

Mae'r strategaeth yn cefnogi dull 'adeiledd yn gyntaf'. Mae hyn yn golygu gwella'r adeilad ei hun, megis inswleiddio, rhwystro gollyngiad aer gormodol a gwelliannau i'r adeiledd cyn neu ochr yn ochr â newidiadau i systemau gwresogi. Bydd hyn yn lleihau'r galw am ynni ac yn helpu technolegau carbon isel newydd i weithio'n fwy effeithiol.

Mae'r strategaeth hefyd yn mynd i'r afael ag ynni adnewyddadwy, solar PV, pypiau gwres ffynhonnell aer, mesuryddion clyfar a chynllunio capasiti trydanol. Mae'r rhain yn gamau ymarferol sydd yn angenrheidiol i leihau allyriadau carbon ac i baratoi at ofynion fflyd ac adeiladau'r dyfodol.

Mae gallu gwrthsefyll effeithiau newid yn yr hinsawdd yr un mor bwysig. Mae Gogledd Cymru yn wynebu risgiau cysylltiedig â llifogydd, amodau arfordirol, tywydd garw a thanau gwyllt. Mae'n rhaid i fuddsoddiad adeiladu yn y dyfodol felly ystyried nid yn unig yr angen i leihau carbon ond hefyd a all cyfleusterau gweithredol wrthsefyll amodau hinsawdd newidiol a pharhau i gynnal ymateb brys.

Y ffocws o ran Carbon

Mae'r strategaeth yn cefnogi llwybr datgarboneiddio 'adeiledd yn gyntaf', technolegau adnewyddadwy a gwell gwybodaeth am ynni.


11. Y seilwaith digidol a deallusrwydd asedau

Mae ar ystâd fodern angen gwybodaeth ddibynadwy. Mae'r strategaeth lawn yn dynodi caffael a gweithredu platfform Rheoli Cyfleusterau â Chymorth Cyfrifiadur (CAFM) fel un o'r buddsoddiadau galluogi pwysicaf yn y rhaglen. Bydd y system hon yn creu un ffynhonnell gwbl gywir o wybodaeth am gyflwr asedau, cydymffurfiaeth, cynnal a chadw, ôl-groniad, gwaith wedi'i gynllunio a rhaglenni cyfalaf.

Ar hyn o bryd, mae rhywfaint o wybodaeth am yr ystâd yn dibynnu ar gofnodion ar wahân, gwybodaeth hanesyddol a chipluniau o gyflwr. Bydd y system newydd yn caniatáu i'r Gwasanaeth symud tuag at reolaeth ystâd mwy cyson, wedi'i arwain gan ddata. Mae hyn yn hanfodol ar gyfer rheoli cydymffurfiaeth statudol, blaenoriaethu atgyweiriadau, cynllunio buddsoddiad cylch bywyd a rhoi adroddiadau ar gynnydd i aelodau ac i'r cyhoedd.

Mae seilwaith digidol y tu mewn i adeiladau hefyd yn bwysig. Mae cysylltedd dibynadwy, systemau sy'n cefnogi hyfforddiant a gweithrediadau a'r gallu i ymgorffori technolegau adeiladu clyfar dros amser yn hollbwysig i orsafoedd modern Wrth i'r ystâd gael ei hadnewyddu, dylid ymgorffori safonau digidol mewn dyluniad yn hytrach na'u hychwanegu'n ddiweddarach.

Bydd gwell deallusrwydd asedau hefyd yn cefnogi tryloywder. Bydd yn helpu i ddangos pam y mae un prosiect yn cael ei flaenoriaethu dros un arall, sut y mae'r ôl-groniad yn lleihau, a yw cydymffurfiaeth yn cael ei gynnal, ac a yw buddsoddiad yn cyflawni'r canlyniadau a fwriadwyd. Mae hyn yn arbennig o bwysig mewn amgylchedd gwasanaeth cyhoeddus lle mae atebolrwydd dros benderfyniadau'n hanfodol bwysig a'r penderfyniadau a wneir yn seiliedig ar dystiolaeth.



12. Blaenoriaethu buddsoddiad a chynllun cyflawni

Mae'r strategaeth yn cyflwyno Fframwaith Asesu'r Ystâd ffurfiol a Matrics Blaenoriaethu Buddsoddiad. Mae'r teclynau hyn wedi'u dylunio i sicrhau bod penderfyniadau buddsoddi'n gyson, yn dryloyw ac yn seiliedig ar dystiolaeth.

Mae prosiectau'n cael eu hasesu yn erbyn y ffactorau a nodir isod. Mae'r pwysiad uchaf yn cael ei roi i **risg weithredol** a **chyflwr adeiladau**, sydd yn adlewyrchu pwysigrwydd ymateb brys diogel ac effeithiol. Mae pwys arwyddocaol yn cael ei roi ar gydymffurfiaeth hefyd oherwydd bod yn rhaid bodloni dyletswyddau statudol.

Maen prawf	Pwysiad
Risg Weithredol	25%
Cyflwr Adeilad	20%
Risg Cydymffurfiaeth	15%
Halgiad	10%
Cydraddoldeb, Amrywiaeth a Chynhwysiant	10%
Lleihau Carbon	10%
Budd Ariannol	10%

Mae hon yn ffordd glir a seiliedig ar dystiolaeth o benderfynu sut y dylid defnyddio cyllid yr ystâd dros oes y Strategaeth. Nid yw'n dileu'r angen am grebwyll, ond yn hytrach yn darparu sail strwythuredig ar gyfer gwneud penderfyniadau, gan sicrhau y rhoddir y pwysau priodol i faterion brys cysylltiedig â diogelwch, cydymffurfiaeth a gwytnwch gweithredol, tra hefyd yn cydnabod gwerth tymor hwy, iechyd diffoddwyr tân, cynhwysiant, cynaliadwyedd, buddion y gweithlu a gwerth am arian.

Delivery is structured in three phases.

Mae **Cam 1** yn canolbwyntio ar flaenoriaethau a sylfeini uniongyrchol. Mae hyn yn cynnwys Bangor, Dolgellau a Phorthmadog, gwaith atgyweirio a chydymffurfio brys, mesurau atal halgiad interim, gweithredu CAFM, mesuryddion clyfar, y newid cynlluniedig o'r Cytundeb Lefel Gwasanaeth Rheoli Cyfleusterau gyda Heddlu Gogledd Cymru (HGC), symud achos busnes Hwb Awen yn ei flaen, a gwaith datgarboneiddio cynnar.

Mae **Cam 2** yn canolbwyntio ar gyflymu'r rhaglen rhwng 2028 a 2032. Mae'n cynnwys ailwampio rhagor o orsafoedd, buddsoddiad cylch bywyd parhaus, gwaith datgarboneiddio, gwelliannau dylunio cynhwysol, gwelliannau rheoli halogiad a chynnydd ar Hwb Awen. Mae'r strategaeth yn cyfeirio at darged o ailwampio tua dwy orsaf y flwyddyn, yn amodol ar benderfyniadau cyllid, capasiti a llywodraethu.

Mae **Cam 3** yn canolbwyntio drawsnewid a chwblhau gwaith ar yr ystâd rhwng 2032 a 2036. Mae hyn yn cynnwys gneud y gwelliannau angenrheidiol yn y gorsafoedd sy'n weddill, sicrhau cynhwysiant a hygyrchedd ar draws yr ystâd, sicrhau parodrwydd gweithdy'r fflyd, datgarboneiddio parhaus a pharatoi ar gyfer cyfnod y strategaeth nesaf.

Dull cyflawni

Mae'r rhaglen yn cael ei chyflawni fesul cam, yn cael ei harwain gan dystiolaeth ac yn destun adroddiadau blynyddol ac adolygiad llywodraethu ffurfiol.

Risgiau cyflenwi a fforddiadwyedd

Bydd cyflawni'r Strategaeth hon yn dibynnu ar argaeledd cyllid, capasiti mewnol, amodau'r farchnad, cymeradwyaethau statudol a chyflawniad llwyddiannus rhaglenni ategol fel trawsnewid rheolaeth cyfleusterau, rheolaeth asedau digidol a datgarboneiddio. Bydd prosiectau unigol yn parhau i fod yn amodol ar gymeradwyo achosion busnes, argaeledd cyllid a phenderfyniadau ynghylch gosod y gyllideb flynyddol. Bydd y risgiau hyn yn cael eu monitro trwy'r trefniadau llywodraethu a nodir yn y ddogfen hon ac yn cael eu hadlewyrchu mewn adroddiadau blynyddol.



13. Llywodraethu, atebolrwydd a mesur llwyddiant

Bydd cyflawniad yn cael ei oruchwyllo trwy drefniadau llywodraethu clir. Bydd y Pwyllgor Tir ac Eiddo a'r Gweithgor Tir ac Eiddo yn craffu ar benderfyniadau am yr ystâd, cynnydd o ran cyflawni, sgorio, blaenoriaethau a pherfformiad. Bydd Tîm Arweinyddiaeth y Gwasanaeth a'r Awdurdod yn derbyn adroddiadau rheolaidd.

Mae'r Gweithgor Tir ac Eiddo yn dwyn ynghyd gynrychiolaeth Gweithrediadau, Cyllid, Pobl ac Ystadau ac undebau llafur. Mae rôl y Gweithgor yn cynnwys adolygu gwarediadau, caffaeliadau, materion prydles, prosiectau mawr, y map ffordd tuag at gyflawni, y Fframwaith Asesu Ystadau a'r dangosfwrdd Dangosyddion Perfformiad Allweddol (KPI)

Bydd cynnydd yn cael ei adrodd trwy'r Adroddiad Perfformiad yr Ystâd blyneddol. Bydd y strategaeth hefyd yn cael ei hadolygu'n ffurfiol ar y pwynt hanner ffordd yn 2031. Bydd hyn yn sicrhau bod y cynllun yn parhau i fod yn un byw, ymatebol ac atebol, yn hytrach na dod yn ddogfen statig.

Bydd llwyddiant yn cael ei fesur trwy gynnydd yn erbyn y blaenoriaethau strategol a welir isod:

Blaenoriaeth	Dangosyddion Perfformiad Allweddol
B1 - Risg yn ymwneud ag Ystâd sy'n Heneiddio a Chylch Bywyd	Proffil graddio cyflwr yr ystâd (% Sgôr Cyflwr 1/2/3); cynnal a chadw adweithiol fel % o gyfanswm y gwariant cynnal a chadw.
B2 - Ôl-groniad cynnal a chadw a chyflwr adeiladau:	% atebolrwydd ôl-groniad i'w ddatrys yn flynyddol; % yr eitemau cydymffurfio wedi'u bodloni o fewn y terfynau amser; cost ôl-groniad fesul metr sgwâr yn erbyn cyfartaledd y portffolio.
B3 - Effeithiolrwydd Gweithredol, Safoni a Lles y Gweithlu	% baeau peiriannau sy'n bodloni'r safon ddimensiynol; sgôr llif gwaith gweithredol; gorsafoedd a gwblhawyd bob blwyddyn yn erbyn y Safonau Dylunio Gofynnol ; % gorsafoedd amser llawn sy'n bodloni'r safon lles sylfaenol.
B4 - Rheoli Halogiad ac Iechyd Diffoddwyr Tân	% y gorsafoedd amser llawn â pharthau sy'n cydymffurfio â Safonau Cyngor Cenedlaethol y Penaethiaid Tân (NFCC); % personél sydd â mynediad at gyfleusterau dad-halogi sy'n cydymffurfio â'r safonau angenrheidiol; sgôr archwilio halogiad blyneddol.
B5 - Cydraddoldeb, Amrywiaeth a Chynhwysiant	%y gorsafoedd sydd â chyfleusterau lles rhywedd-niwtral; % y gorsafoedd sy'n llwyr fodloni'r Safonau Dylunio Cynhwysol; Sgôr archwilio EDI; cydymffurfiaeth hygyrchedd%.

B6 - Seilwaith hyfforddi	Achos Busnes Llawn Hwb Awen a statws carreg filltir cyflawni; proffil cyflwr twr hyfforddi; sgôr medrusrwydd cyfleuster hyfforddi; % safleoedd sy'n bodloni'r safon hyfforddiant gweithredol.
B7 - Datgarboneiddio a Chynaliadwyedd:	% y gostyngiad yn allyriadau carbon yr ystâd a'r fflyd o waelodlin 2025/26 (743.1 tCO ₂ e Cwmpas 1 a 2); % yr ystâd sydd â phwmp gwres; % â tho addas gyda solar PV; % y fflyd wen ag allyriadau sero / isel dros ben, cynnydd tuag at gyrraedd targed sero net 2030.
B8 - Seilwaith Digidol a Deallusrwydd Asedau	% yr eiddo gyda mesuryddion clyfar; % y gorsafoedd llawn amser gyda BMS; Cwmpas CAFM a chyflawnrwydd data; Cydymffurfiaeth â'r Safon Seilwaith Digidol; statws adolygiad gwytnwch ystafell reoli.
B9 - Trawsnewid Rheolaeth Cyfleusterau a Gallu Llywodraethu	Tîm Rheoli Cyfleusterau mewnol yn weithredol erbyn Ebrill 2027; cyfarfodydd craffu'r Gweithgor Tir ac Eiddo yn cael eu cynnal; Adroddiadau Perfformiad Ystadau yn cael eu cyflwyno'n brydlon; alldro'r rhaglen gyfalaf v. y gyllideb.
P10 - Cyfyngiadau Ariannol a Disgyblaeth Fuddsoddi	Amrywiad y rhaglen gyfalaf o'i gymharu â'r gyllideb gymeradwy; % y cyfalaf a ddyrannwyd yn unol â graddiad y Matrics Blaenoriaethu Buddsoddiad; cyllid a gafwyd o ffynonellau ar wahân i'r Awdurdod Tân (grantiau Llywodraeth Cymru, Cronfa Ffyniant Gyffredin y DU, buddsoddiad mewn partneriaeth).

Mae ein hymrwymiad yn glir. Erbyn 2036, dylai pob gorsaf a chyfleuster cynnal fod wedi'i wella, ei asesu neu ei gynllunio yn unol â'r strategaeth hon. Y nod yw bod ag ystâd sy'n fwy diogel, yn fwy cynhwysol, yn fwy cynaliadwy, yn fwy gwydn ac sy'n gallu cefnogi cymunedau Gogledd Cymru ar gyfer y genhedlaeth nesaf.



14. Casgliad

Mae'r Strategaeth yr Ystâd hon ar gyfer 2026–2036 yn ddatganiad o uchelgais ac yn rhaglen weithredu ymarferol. Mae'n seiliedig ar dystiolaeth o'r asesiad o gyflwr stoc, arolygon datgarboneiddio a'r seilwaith digidol, gwaith addasrwydd gweithredol, yr Adolygiad o'r Ddarpariaeth Frys, proses achos busnes Hwb Awen a'r gwaith o drawsnewid trefniadau rheoli cyfleusterau. Mae hefyd yn adlewyrchu barn y rhai sy'n gweithio yn, yn rheoli ac yn dibynnu ar gyfleusterau GTAGC bob dydd.

Mae'r heriau'n sylweddol. Mae'r Gwasanaeth yn wynebu atebolrwydd cynnal a chadw ôl-gronnus amcangyfrifedig, gofynion rheoli halogiad, cyfleusterau y mae angen iddynt adlewyrchu gweithlu modern a chynhwysol yn well, a rhwymedigaeth gyfreithiol i ddatgarboneiddio'r ystâd a'r fflyd erbyn 2030. Mae'r materion hyn yn effeithio'n uniongyrchol ar iechyd, urddas, diogelwch ac effeithiolrwydd gweithredol personél GTAGC.

Fodd bynnag, mae sylfeini cryf eisoes yn eu lle. Mae'r Achos Busnes Amlinellol ar gyfer Hwb Awen wedi symud ymlaen trwy'r prosesau llywodraethu; mae cynlluniau gweithredol ar y gweill ar gyfer Bangor, Dolgellau a Phorthmadog; mae arolygon cyflwr adeiladau, datgarboneiddio a digidol cynhwysfawr wedi'u cwblhau; ac mae'r Adolygiad o'r Ddarpariaeth Frys wedi dilysu'r ystâd bresennol o orsafoedd. Mae'r cyflawniadau hyn yn darparu llwyfan clir ar gyfer gwelliannau hirdymor i'r ystâd.

Cryfder y strategaeth hon yw ei hedau aur clir. Mae materion strategol sy'n sbarduno'r galw ar y gwasanaeth yn arwain at flaenoriaethau diffiniedig, mae blaenoriaethau'n arwain at opsiynau, mae opsiynau'n cael eu hasesu trwy'r Fframwaith Asesu'r Ystâd a'r Matrics Blaenoriaethu Buddsoddiad, a chaiff prosiectau wedyn eu gosod yn y cynllun cyflawni a'u monitro trwy ddangosyddion perfformiad.

Bydd y penderfyniadau a wneir trwy'r strategaeth hon yn siapio ystâd GTAGC am genhedlaeth. Byddant yn pennu ansawdd, cynaliadwydd a chynhwysiant y cyfleusterau a ddarperir i ddiffoddwyr tân, staff a chymunedau ledled Gogledd Cymru.

Bydd y strategaeth yn cael ei hadolygu'n ffurfiol hanner ffordd drwyddi yn 2031 a'i hadnewyddu ar gyfer 2036–2046. Bydd cynnydd yn cael ei adrodd yn flynyddol i Bwyllgor Adnoddau'r Awdurdod Tân a'i graffu arno bob chwarter gan y Pwyllgor Tir ac Eiddo a'r â'r Gweithgor Tir ac Eiddo.



**Gwasanaeth Tân ac Achub
Fire and Rescue Service**